

甲編地理

卷一 建置沿革

卷二 山川道路

卷三 城垣公廨

區村

卷四 祠廟古蹟

梨樹縣志

臧式毅
題



梨樹縣志甲編

地理

土地者人類所賴以生存者也居住則託庇大陸運輸則藉助河流衣食則取資於動植各物是地對於人有莫大之供給人對於地有無限之需求其關係至爲密切故國家爲治必汲汲於正經界闢田疇辨土宜考物產者蓋爲發展地利以厚民生故也梨邑地屬邊荒幅員遼闊居斯土者由游牧而耕稼闢草萊爲隴畝歷年既久演進無疆迄今物產富饒人民樂業雖屬人事之經營而亦天然地勢有以致之誠繼此提倡而改良之行見地盡其利民裕其財發達繁榮未可量也志地理



甲編地理卷一

建置沿革

梨樹初名買賣街原屬蒙旗達爾罕王分藩地也自明季迄清初居人鮮少自

嘉慶八年蒙王奏請招民墾荒以裕食采清廷遂弛禁流民出邊逐漸開闢道

光元年始設梨樹城照磨爲昌圖分防光緒四年升治奉化縣民國三年改名

梨樹縣所謂梨樹城者在今偏臉城之南本村落而名之曰城蓋古號也按梨樹之

義不知所自起嘗考其生物黎非斯地特產樹尤寥寥罕植間有植之亦無佳者舊志言以古有梨樹得名此臆說也父老或言此地原屬高句麗以蘇姓得

名故地有赫爾蘇昭蘇河蘇龍起等號此地本名列蘇城一說城在蘇河之裏故曰裏蘇偏臉城在河之表故又曰昭蘇所言梨樹者蓋轉音耳斯說較爲近

是其中陷荒服久淪異域考之金元等史則自遼以來即爲郡縣至元始隸

蒙籍史乘地志昭昭可考是不可列以化外棄古不論也

歷代沿革

梨樹沿革舊多謬誤憑空臆造指遼中京大定府及元大寧路界爲本境方域以致地方人物錯誤層出茲謹按各代歷史參以圖志上自唐虞下迄滿蒙分列於下以備考訂

唐 屬青州 書傳爾雅禹平水土建九州以齊北及遼海地爲青州是地屬

青州北域禹貢嵎夷既略是也

書傳

虞 屬營州 舜分十二州以遼海地爲營州因地當營室之分野故曰營州

書傳

夏 屬青州 禹仍舊制合爲九州

書傳

商 同前

周 屬幽州爲肅慎國 史稱併營於幽州周禮職方氏東北曰幽州武王十

四年肅慎氏貢楛矢左傳肅慎燕亳吾北土也周時遼水以西屬幽州遼水

以東南部屬朝鮮北部屬肅慎氏山海經大荒北有山名不咸有肅慎國不

咸即長白山可知三代肅慎最廣也 周官 通鑑 山海經

秦 屬遼東外徼 通鑑秦築長城至遼東注遼東爲奉天府東南錦州西南

地考漢史秦屬遼東外徼光武二十五年遼東徼外貊寇邊山海經云濊貊

爲扶餘國高句麗別種 即此地也 漢史 通鑑 山海經

漢 屬元菟郡 考漢史漢初爲北貊至衛滿盛屬朝鮮武帝元封三年平朝

鮮地爲元菟郡治高句麗縣一統志今興京東北有高句麗縣故城又魏志

高句麗在遼東千里北接扶餘國扶餘去玄菟千里又元菟後移郡高句麗

西北二百里所謂玄菟故府是也

漢書 魏志 地圖

東漢 屬玄菟郡 王莽建國四年發高句麗爲亂明帝二年祭彤大破烏桓

高麗元菟讐附傷安問句麗王宮反數寇遼東宮死子伯固降屬遼東嘉平

中更屬元菟

漢書 魏志

三國 屬遼東 漢末公孫度盡有遼東之地至魏延熙元年司馬懿討公孫

淵平之置平州

魏志

晉 屬平州後燕國 考晉史以慕容廆爲平州刺史咸和六年慕容皝盡有

遼東之地又擊走高句麗是地遂入燕北魏太延二年魏伐燕燕王弘入高

麗

鮮今朝

是地遂爲高麗之外界

按燕建都龍即今之遼興中府也 龍城在熱河塔子溝東北即遼興中府也 晉史

一統志

南北朝 屬高麗地

唐 屬安東都護府後渤海國 唐史太宗伐高麗渡遼水圍平壤所謂駐蹕

山御泥河故蹟均在奉天遼陽界非此地也惟高宗總章元年薛仁貴破高

麗於金山拔扶餘城事平設安東都護府是地遂入版圖武后時大榮祚居

營州東據東牟山

山在遼東國即今吉林地

開元元年詔以爲渤海王高麗靺鞨

即肅慎國

皆歸之是地遂入渤海

唐書

地理志

梁 屬渤海國 至唐天祐時大氏衰

後唐 屬契丹 明宗天成元年契丹主按巴堅攻渤海拔扶餘城更名東丹

國 遼史通鑑

後晉 屬遼黃龍府 天福十二年遼滅晉徙晉主重貴於黃龍府注地理志

契丹以扶餘城爲黃龍府

按黃龍即今農安縣界扶餘即今吉林新城前志稱黃龍在開原北者蓋約指而言之也遼史

地圖 地理志

後漢 同前

後周 同前

宋 同前 遼史契丹見黃龍於扶餘城遂易名爲黃龍府考通鑑及地理志

黃龍地接益州

見金太祖攻黃龍紀

南爲韓州

遼置元省在開原縣東北曾遷宋徽欽二帝於此

西接臨潢

府

遼以臨潢爲上京在潢水上游潢水即西遼河老河源

北接肇州

在郭爾羅斯後旗

東接信州

全遼志信州在開原

縣東北三百十里見許元宗奉使行程錄即今懷德縣是也通鑑一統志地圖

南宋 屬金龍安府歸咸平路隸上京 宋徽宗政和五年金太祖取遼黃龍

府大定中改隆州貞祐初升龍安府今科爾沁東南二百里有隆安城疑即

其地也 全史 通鑑

元 屬開元路 金至寧元年故遼人耶律留格乘亂取遼東州郡降蒙古元

後以爲開元路 元史

明 屬遼海衛 洪武八年設遼東都指揮改元之開原路爲三萬遼海二衛

三萬衛即開原遼海衛即昌圖二十二年又置外衛以元裔兀良哈爲都指揮掌衛事後自

立國號科爾沁即今達爾汗蒙荒之緣起也 通鑑 續通考

清初 屬科爾沁道光建元設黎樹城光緒四年升治奉化縣隸昌圖府 通志

民國 奉化列二等縣隸洮昌道三年改名黎樹縣十七年裁道直隸遼寧省

(舊志節畧)奉化虞爲營州夏屬冀州周在幽州之分野秦界遼西漢爲新安

平縣漢末步奚居之魏武北征縱兵大戰降者十餘萬衆去之松漠其後拓

拔氏乘遼建牙於此當饒樂河水之南溫榆河水之北唐初屬營州太宗伐高麗於此駐蹕貞觀中奚酋克都內附置饒樂郡咸通以後契丹始大奚族不敢復抗遼太祖興國舉族臣屬聖宗建爲都號中京大定府金仍大定府隸北京路元置大甯路領九州七縣明初奚攘諸漠北置遼海衛備之至中葉元裔由漠北入漠南邊防復棘我朝龍興內蒙古臣服最先云云（中略）按明史元遼王內附帝即其地置三衛自錦義至遼河曰泰甯自全甯抵喜峰口近宣府曰朵顏自黃泥窪至開原曰福餘統在黑龍江南爲元大甯路境按大甯路所領之高州利州與和衆惠和金源龍山等縣質之李兆洛輿地韻編皆在今喀喇沁左右與科爾沁部均爲內蒙古東四盟之地在元顯然當以大甯路斷惟奉邑地小無從指實耳（末略）按直隸喜峰口外元大

寧路也又聖武記言蒙古召烏達一盟與科爾沁之哲里穆同爲東四盟之

一其召烏達貢道由喜峰口則是通爲大甯路不甚相遠矣云云按

步度根

本鮮卑種考魏志外夷傳步度根東接遼水西當西城非此地也魏武北征引兵出盧龍經白檀至柳城還軍一統志白檀在承德州柳城系塔子溝界

均屬熱河尤非此地也饒樂河即白狼水史稱其在喀喇沁之明安山考與圖即興安嶺由故大甯城逕古柳城至黃龍之北與潢河合潢河即遼水之

西一源據水而論是饒樂亦在今熱河界五代改郡爲州唐尤無置郡之制至遼中京大定府史及一統志明稱其在錦州之西廣甯邊境元之大甯路

區即大甯府故址在熱河之喜峰口高州利州均在喀喇沁左右統隸熱察兩區均非此地也東四盟疆域至廣詎可混一而言謂爲不甚相遠乎明改開

元路爲遼海衛又烏得達隸大甯哉通鑑地志班班可考故僅錄其梗概以爲來者考据之資非敢妄辯也

附錄設治原案

梨樹自經蒙荒招墾人民麇集於是連陌荒田闢爲沃壤蒙王收其租賦漢官

理其人民初歸昌圖廳直轄道光建元分設照磨光緒四年升縣治茲錄其設

治原案俾食毛踐土者咸知所本焉

光緒三年正月前署盛京將軍崇厚會銜請升昌圖府治并添奉懷廳縣

奏稿

奏爲昌圖廳屬幅員遼闊擬請升爲府治添設廳縣教佐各官以資治理而廣教化恭摺仰祈聖鑒事竊查奉省北邊外昌圖廳所轄幅員一千六七百里蒙民雜處盜賊出沒無常廳屬朝陽坡地方曾聚匪徒抗官拒捕同治四年經欽派原任大學士文祥帶兵痛剿始臻安謐該廳本係蒙古地界邇來流民日多耕種殆徧械鬪命盜之案層見迭出祇一同知獨任其事分設經歷照磨各一員襄同佐理地大事繁實有鞭長莫及之勢曾經前署將軍尙書崇實統籌奉省全局以該廳亟須添官增兵藉資治理而廳屬地租向來蒙古自管無款可籌因請試辦河稅斗租以爲經費奏明在案旋經崇實飭派委員前往會同該

廳同知趙受璧安定章程試行辦理該處商民以此款爲設官增兵之用亦甚樂從計自上年六月以來河稅一項因河水淺涸船隻難通未經開辦所有斗租試辦半年業已收有一萬七百三十餘兩除去委員盤費尙存九千九百六十餘兩就現在試辦每年可以收銀二萬一千餘兩雖不能作爲定額以之設官增兵尙敷支用目下地方甚關緊要所有應行升設添設各官自應及時議定請旨遵行查前署將軍尙書崇實原奏擬將昌圖廳同知升爲知府再於黎樹城增設通判一員八家鎮增設知縣一員并於廳屬西南康家屯地方增設知州一員分設佐雜各官相助爲理等因現在奴才等察看情形康家屯一處離昌圖較近似可毋庸添設知州擬請將該廳升爲府治仿照熱河承德府之例仍管地面詞訟各事即康家屯地方亦可歸其自理移設八家鎮經歷於康

家屯分防再移黎樹城照磨於八面城駐紮均照舊請加六品銜分司緝捕土匪並勘驗命盜各案凡有地方詞訟戶婚田土細故准其就近審理徒罪以上送由該府訊辦并將該廳巡檢一員升爲府司獄訓導一員升爲府教授既足以重地方亦可以符體制此奴才等現擬升設昌圖府之情形也八家鎮黎樹城兩處原設經歷照磨各一員分防佐理該兩處均係扼要之區政務殷繁措置非易該經歷等職小權輕難資整頓今擬黎樹城改爲廳治添設通判一員名曰奉化廳另添巡檢一員管理監獄八家鎮改爲縣治添設知縣一員名曰懷德縣另添典史一員管理監獄並均添設訓導各一員以興學校該廳縣應照章請加理事同知銜以便蒙民兼理所有昌圖府自理詞訟徒罪以上命盜各案應申詳驛巡道審轉以昭慎重至奉化廳懷德縣自理徒罪以上之命盜

各案則應詳由昌圖府審轉徑詳府尹核辦此奴才等現擬添設廳縣教佐各官之情形也似此星羅碁布既有提綱絜領之人藉資表率亦復劃界分疆而治各專責成但使地方慎選得不難從容整頓惟是該處地廣民頑盜風未息東北直接吉林邊防尤難鬆緩現在三盟及吉林各客隊在彼駐紮馬隊四五百名之多兵力尙覺單薄邊外情形實與內地不同若非多設捕盜弁兵非特緝捕難期得力且亦不足鎮壓地方現擬於該府廳縣另添捕盜營馬隊二百名交昌圖府分撥調遣以專責成所需餉乾照章給發即由此項斗租支消以該處之所出供該處之所需既免另籌餉項並可撫輯閭閻莫此爲便至於學校之事風化攸關現既升設府學教授並於奉化廳懷德縣添設訓導各一員若不增廣學額無以鼓勵人材自應酌量議增以廣教化俾令地方有所觀

感庶幾默化潛移民風漸歸敦樸以副朝廷綏靖邊陲之至意其修建衙署監獄各費即在上年秋冬兩季所收斗租項下動撥如有不敷仍在本年所收斗租開支廉俸工食捕盜兵餉馬乾餘存項下次第興辦以上擬請升設添設各員如蒙俞允相應請旨飭部頒發印信關防以昭信守奴才等爲因地制宜起見所有清界址定缺分並一切廉俸役食以及文武學額弁兵餉乾應行詳議各事宜謹繕清單並繪具擬升昌圖府改設廳縣全圖貼說恭呈御覽合無仰懇天恩飭下部臣核議施行實於地方大有裨益其未盡事宜容奴才等再行籌議隨時奏聞理合會同奉天府府丞臣楊書香合詞恭摺具奏伏乞皇太后皇上聖鑒訓示謹奏奉旨該部議奏單片圖併發欽此

部議照准惟查通判非知府屬員擬設奉化廳一缺應再酌核奏明辦理